

壽恒曰清帝將出來瀋陽是必告祭南方成功之由問安使今當趨程入送而彼若以使臣官秩未高詰責則事亦可慮臣等奉使入往為萬全閔鼎重亦自請上以國家多事大臣不可遠赴命擇秩高宗班入送以檜原君倫為問安使○戶曹判書鄭載嵩被臺論後屢召終不應金壽恒閔鼎重白於上曰特命牌招至六七次而偃然不出國家雖疲弊豈至於無一載嵩而不可辦事乎宜有所警責上命遞差鼎重又言罰輕上命罷職壽恒又以譯官李涵居間假托有求請事請集示警衆上許之○陞尹堦為戶曹判書朴相馨為掌令任元考為持平○承旨宋昌往諭領府事宋時烈時烈辭以老病不能承命上更遣承旨慰諭敦召○乙未夜南方有氣如火光○領議政金壽恒左議政閔鼎重請對言瀋陽問安使事體有別請以大臣差遣上許之以鼎重差送都承旨李師命言辛亥年問安使無書狀官今大臣奉命出疆事體自別宜差送書狀官上是之以尹世紀為書狀官壽恒言檜原君倫差問安使稱病圖免當有警責上罷倫職○右議政李尚真劄論重臣宗班不肯行問安使乃以大臣代之臣僚之行止勞佚惟意所欲殆近於前朝之季不但有乖國體違例創新亦關後弊請勿以大臣差遣移授重臣前後托病圖免者並從重科